

四庫全書

集部

欽定四庫全書

集部

大全集卷一至三

詳校官庶吉士<sub>臣</sub>李傳熊

中書臣劉源溥覆勘

總校官原任中允<sub>臣</sub>王燕緒

校對官中書<sub>臣</sub>李斯咏

謄錄監生<sub>臣</sub>譚世偉

欽定四庫全書

集部六

大全集

別集類五明

提要

臣等謹案大全集十八卷明高啟撰啟字季迪長洲人元末避張士誠之亂隱居松江之青丘自號青丘子洪武初召修元史授翰林院國史編修官至戶部侍郎後坐撰魏觀上梁文被誅年僅三十九所著有吹臺集江館

集鳳臺集婁江吟稿姑蘇襍詠凡二千餘首  
自選定為岳鳴集十二卷凡九百餘首啟沒  
無子其姪立於永樂元年鏤板行之至景泰  
初徐庸掇拾遺佚合為一編題曰大全集劉  
昌為之序即此本也啟天才高逸實據明一  
代詩人之上其於詩擬漢魏似漢魏擬六朝  
似六朝擬唐似唐擬宋似宋凡古人之所長  
無不兼之振元末纖穠縝麗之習而返之於

古啟實為有力然行世太早殞折太速未能  
鎔鑄變化自為一家故備有古人之格而反  
不能名啟為何格此則天實限之非啟過也  
特其摹仿古調之中自有精神意象存乎其  
間譬之褚臨稭帖究非硬黃雙鉤者比故終  
不與北地信陽太倉歷下同為後人詬病焉  
乾隆四十四年五月恭校上

總纂官臣紀昀臣陸錫熊臣孫士毅

總校官 臣陸費墀

大全集序

故嘉議大夫戶部侍郎前翰林國史院編修官授諸王  
經青丘先生高啓文集一十八卷舊一千若干篇今二  
千若干篇儒士徐庸字用理之所廣也用理旣以類廣  
先生文集乃以示昌昌謹為序之曰夫將以所學明先  
王之道救當世之弊則必著於言焉庶幾見者之有聞  
者之有考也六經更聖人之手其言粹然一出於正要  
之所以存鑒戒者亦多聖人旣歿縱橫捭闔之說興大

道幾微漢廣游學之路董生賈誼始各以其學自見著  
書數千萬言沉雄簡奧其明先王之道陳當世之務略  
備矣唐韓愈起力變八代之衰習故其言惟醇而杜甫  
李白又各以其學自見明王道具時政謂之詩史宋歐  
陽修博學力行本論之言有益於治至朱元晦則根據  
六經之旨攘斥百氏之非歸然為世儒宗其大要使人  
審王伯之略致義利之辨而已今諸家之言具存考之  
可知用之猶尚可行也蓋三代而下漢唐宋之所以崇



德著業而繼焉以稱治者有賴於是焉先生生元丙子  
少稟神慧長讀六經諸家之言融而通之會而成之又  
取而力行之其發之於言則浩乎如大川之決防也鏘  
乎如洞庭之張樂也儵乎如幽壑之舞蛟也致之於用  
則如射者之於的準乎其無疑也然值國步之既促不  
苟於用隱於青丘登高望遠撫時懷古其言多激烈慨  
慷若將於世無足為者及我太祖高皇帝定鼎建業肆  
詔徵賢先生起與元史之修錄善醜惡儒者之功庶幾

彰施史成授諸王經進戶部侍郎尊顯極至先生感之力頌先王之道以匡濟世務言多雄偉奇古足以聳張德業裨益治化時甚賴之未久即辭去去後亦蹇連以死嗚呼殆天所以厄斯文也嘗竊論焉天道惡滿取之不可以全然誦其身則必信其聲是以董賈賤逐而名長甫白窮放而詩傳韓愈歐陽修朱元晦雖號通顯而未免罷斥然其言至於今誦習而師承者不衰正柳宗元所云生而不遇死則垂聲者衆也先生死始三十有

九使少優游而待之則得將止於是乎言將止於是乎  
行將止於是乎嗚呼天實為之謂之何哉用理師學於  
先生之言得之既深遂勒圖傳之亦使聞者考之而可  
知見者用之而可行以明其言之果有賴於世也嗚呼  
厚矣景泰元年庚午冬十二月望日賜進士出身吳劉  
昌序



高太史本傳

高啓字季迪吳郡人生元丙子少警穎力學遂工於詩  
上窺建安下逮開元大厯以後則貌之天資秀敏故其  
發越特超詣擬鮑謝則似之法李杜則似之庖丁解牛  
肯綮迎刃千彙萬類規模同一軌山龍華蟲如其貴也  
象犀珠玉如其富也秋月冰壺如其清也夏姬王嬙如  
其麗也田文趙勝如其豪也鳴鶴翔雲如其逸也仍和  
陶韋大羹玄酒之味不閑二宗粟布之征所謂前齒古

人於曠代後冠來學於當時者矣東吳騷雅士悉推之  
無嫌為文尚氣多辨難攻擊之體讀之疊疊忘倦大抵  
以先聲掩其兼美張士誠有浙右時羣彥多從仕者啓  
獨挈家依外舅周仲達居吳淞江上歌詠終日以自適  
焉陪臣饒介之丁仲容輩以詩自豪及見啓為歎服啓  
尤好權略論事聳人聽故與饒如授左契定交者若王  
彝楊基杜寅張憲張羽周砥王行宗克徐賁之徒胥不  
羈瞻才爽邁有文談辨華給憫然以為天下無人一時

武勇多下之明興以某臣薦偕謝徽等聞於朝與修元  
史授翰林國史編修官復命教授諸王久之推任喉舌  
之司待以不次與徽等懇辭乞歸田里制可仍賜金以  
還復居江上遨遊青丘甫里之墟始號槎軒又號青丘  
子銳志亦不少衰矣居幾何忽從故時一二俠入遊於  
郭適江夏魏觀為郡老而好士延見王彞輩啓嘗會於  
京尤禮遇之不得已亦廁為客復強辭之歸故里殊悒  
悒不樂遂蹇連以歿年甫三十九嗟乎使啓少延則駸

駁入曹劉李杜之壇矣止此哉其詩類藁藏於家未即  
顯初富商陳寶生欲為壽諸梓啓不許乃止凡傳錄而  
誦之者無不歆羨必不泯焉予與啓同里知其人為詳  
故特為傳以貽不朽云洪武乙卯二月隴西李志光書



欽定四庫全書

大全集卷一

明 高啟 撰

古樂府

上之回

聖主重行幸六蚪法乾旋北巡初避暑東祠已祈年羣  
宮從清塵絜若星麗天前揚豹尾竿左靡魚須旃瀚海  
通漢月蕭關絕塞煙願奉千齡樂皇躬長泰然

君子有所思行

騁望京輔地，金城千里餘。  
我我松柏陵，霑霑桑柘墟。  
明堂表青陽，飛觀切紫虛。  
況有戚里第，高樓夾清渠。  
愛妾舞羅襪，嬖奴鳴珮琚。  
東園賜祕器，上林乘副車。  
玄運有恒旋，盛時無久居。  
勿嗤城南巷，寂寞揚雄廬。

李夫人歌

延年罷歌，少翁望蘭芬。  
淒淒銷複帳，臨殁最難忘。  
歆歆不相嚮，陳杯觴。  
列燈火，是耶非幄中。  
坐新宮，漏殘星欲

墮

古別離

他人豈不別所別諒有由嗟君今何營輕薄好遠遊遙  
遙京洛車汎汎江漢舟君身非賈胡所至自輒留徽音  
已冥邈思懷尚綢繆露滋紅蘭春霜變綠桂此時望  
歸來含情上高樓川途本無限君去焉得休願令中斷  
阻化彼山與丘

燕歌行

清商變節朱火連嚴霜塗庭卉木腓邊城早寒未授衣  
念君遐征不能歸涼風時來動中闈蠅蛸在戶熠燿飛  
賤妾宵興歎無依簪珥不施減容輝欲寫憂思撫瑤徽  
君今不在聽者稀啓明未出燈已微愛而不見徒歡歎  
吳趨行

僕本吳鄉士請歌吳趨行吳中實豪都勝麗古所名五  
湖洶巨澤八門洞高城飛觀被山起游艦沸川橫土物  
既繁雄民風亦和平泰伯德讓在言游文學成長沙啓

霸基異夢表休禎舊闕凡幾家奕代產才英遭時各建  
事徇義或騰聲財賦甲南州詞華竝西京茲邦信多美  
粗舉難備稱願君聽此曲此曲匪誇盈

南山有鳥

南山有鳥北山羅兩地一失驚風波哀鳴獨宿心靡他  
竟抱幽恨歸山阿不及山上松纏綿同女蘿君歸來聽  
妾歌相思感君情意多贈君明珠淚滂沱死生茫茫終  
奈何

玉波冷雙蓮

金風暮剪雙頭藥，啼臉辭秋嫵。  
血紫宮女三千罷，笑喧錦雲障。  
冷鴛鴦死滿江煙，玉流古香尋。  
魂弔影愁茫茫，吳天墜露衰紅溼。  
一夜波涼小龍泣。

藥秀葯華

春香上羅襦，暗引蘭橈渡蝶散。  
掩紅房，王孫歸已暮。  
斜條拂蛾眉，采擷同芳杜。  
脈脈雨煙濃，江皋斷腸路。

吳鉤行

吳鉤若霜雪吳人重遊俠  
鐔前含笑看上有仇家血

短歌行

置酒高臺樂極哀來人生處世能幾何  
哉日西月東百齡易終可嗟仲尼不見周公  
鼓絲拊石以永今日歡以別虧憂因會釋  
燕鴻載鳴蘭無故榮子如不樂白髮其盈  
執子之手以酌我酒式咏短歌爰祝長壽

白馬篇

白馬銀鑣鞍流光皎如練  
龍沙積雪裏一去誰曾見昨

日羽林兒獨拜建章殿天子親賜與騎向交河戰疾驅  
不辭家恐獲逗遛謫萬里倏若飛神速虜難變前收日  
逐屯右斷康居援事定入關來箠中有餘箭

宛轉行

宛轉復宛轉宛轉日幾迴君腸轆轤斷我腸車輪摧

長門怨

憎寵一時心塵生舊屋金苔滋銷履迹花遠度鑾音暮  
雀重門迴秋螢別殿陰君明猶不察妒極是情深



班婕妤

微誠雖可守，妙舞却難工。  
已別增成舍，初來長信宮。  
扇歸秋篋裏，燭滅夜帷中。  
莫忌爭新寵，曾辭玉輦同。

閭闔篇

天門迎旭開紫霞，八表洞達春無涯。  
閭道縈迴度鸞車，羽旗揚彩鐘鼓撾。  
後宮三千人，秀色掩盡世上花。  
宸遊時過廣成家，瑤觴再壽盛露華。  
一仁興萬福，加何須慕神仙。  
平勤煉丹砂，小臣微詞欲拜獻。  
帝德自大非為誇。

塞下曲

日落五原塞蕭條亭堠空漢家討狂虜籍役滿山東去  
年出飛狐今年出雲中得地不足耕殺人以為功登高  
望衰草感歎意何窮

折楊柳歌詞

高枝拂翠憶低枝垂綺筵春風千萬樹此樹妾門前

其二

江頭橫吹悲北客休南去聞道武昌門愁人無別樹

瑩侯引

濁流赴海東若傾津卒刺船朝不行公乎提壺徑欲渡  
大聲呼公公不顧饑鯨饒蛟肆啖吞竟以深淵作高墳  
貪生惡死誰不有公獨不然果狂叟二十五絃彈且歌  
公今渡河將奈何公今渡河將奈何

將進酒

君不見陳孟公一生愛酒稱豪雄君不見揚子雲三世  
執戟徒工文得失如今兩何有勸君相逢且相壽試看

六印盡垂腰何似一卮長在手莫惜黃金醉青春幾人  
不飲身亦貧酒中有趣世不識但好富貴亡其真便須  
吐車茵莫畏丞相嗔桃花滿谿口笑殺醒遊人絲繩玉  
缸釀初熟搖蕩春光若波綠前無御史可盡歡倒著錦  
袍舞鸛鶴愛妾已去曲池平此時欲飲焉能傾地下應  
無酒壚處何苦寂寞孤平生一杯一曲我歌君續明月  
自來不須秉燭五岳旣遠三山亦空欲求神仙在杯酒  
中

雨雪

雨雪暗桑乾  
深愁沒馬鞍  
臨關將月認  
覆磧作沙看  
不阻蕃兒獵  
聊供漢使餐  
春風消不得  
三月戌袍寒

其二

雨雪暗龍沙  
愁陰入漢家  
恨迷青冢草  
驚見黑山花  
夜積瓊廬重  
朝隨羽旆斜  
空思鵲觀柳  
色變年華

羅敷行

陌上三月時  
柔桑多綠枝  
攜筐行采葉  
日暮畏蠶饑  
君

來駐車馬相逢在桑下漫說同心言不是知音者君貴  
多輝光妾賤無紅妝自信田間婦難從天上郎長安畫  
樓宇無限如花女使君當早歸莫共羅敷語

當壚曲

光豔動春朝妝成暎洛橋錢多自解數箏澀未能調花  
如秦苑好酒比蜀都饒深謝諸年少來沽不待要

遊俠篇

遊俠向何處蕩蕩長安城城中暮塵起殺人無主名所

殺豈私讎激烈為不平新削安陵刀光奪衆目明不畏  
赤捧吏里閭自橫行灌夫託為友袁盎事以兄負氣不  
負勢傾身復傾情笑顧少年輩瑣瑣真可輕

關山月

月出遼海東朔雲捲塞風纔升榆塞遠復照柳城空影  
滿雕弧外光沉金柝中思家舉頭望今夜一軍同

鞠歌行

玉蘊彩劒閔鋒牛鐸之音混黃鐘俾神奇作妄庸揚微

察陋世罕逢物有合勢必從如魚得水雲與龍夷吾因  
伊尹農二主舉之享萬鍾嗟古人孰繼蹤女子猶為悅  
已容

古詞

妾刀不斷機郎行當早歸還將機中錦作郎身上衣

王昭君

都門塵拂春風面臨別看花淚如霰君王惆悵惜蛾眉  
不似前時畫中見白髮呼韓感漢恩寧甘謾號關支尊



檀棗肉食本異俗不如但嫁巫山村黃沙白雪無城闕  
手冷鴟弦夜彈歇相隨萬里到穹廬只有長門舊時月  
妾語還憑歸使傳妾身沒虜不須憐願君莫殺毛延壽  
留畫商巖夢裏賢

烏夜啼

啼鳥驚多棲未久半起疎桐上高柳燈下佳人顰淺眉  
機中少婦停纖手月入空閨夜欲深數聲猶似聽君琴

行路難

君不見盤中鯉暫失風濤登俎几君不見枝上蜩纔出  
冀壤凌雲霄推移變化詎可測勿謂明日同今朝出乘  
高車入大馬半是當年徒步者范叔曾逃客溺餘衛青  
亦在人笞下悠悠行路莫相欺為雌為雄未可知

其二

危莫若編虎須險莫若觸鯨牙行路之難復過此前有  
瞿塘後褒斜杯酒朝驩矛刃夕加恩仇反覆間楚漢生  
一家鈎弋死雲陽鴻夷棄江沙所以賢達人高飛不下

避罔置行路難堪歎嗟

其三

雕牀玉案刺繡茵宜城酒多光照春坐留北方之上客  
歌侑南國之佳人盛時徂流若川水榮貴長存竟誰是  
魏帝高臺碧瓦空梁王故苑黃塵起世人傾奪首未迴  
可憐不飲冢纍纍

劉生

結客諸陵下平生好排難鵝瑩白楊刀鵲驚黃柘彈投

瓊遠郎夜擊筑高樓旦念無可報恩空推車壁歎

怨歌行

妾始充下陳嬌容常自持上宮三千妓一一妒蛾眉  
絃急有斷聲鏡暗無妍姿遂令開時花遽作落後枝  
昨夕歌吹歡今夕蛩語悲從來班婕妤不勝趙昭儀

雉子班

雉子班雖朝陽低飛蓬蒿隱文章十步一啄于彼山梁  
爭雄決鬪憤氣張好勇守介性之良安能受馴畜斂翼

自摧傷

蒿里歌

素驂駕廣柳蕭蕭出城闔玄廬儼象設猶恐死有神古  
原閉愁冤荒草不得春一作泉下客長違室中親昔興  
每待旦今卧焉知晨斂衣已成灰含貝仍作塵家門諒  
不遠欲歸竟何因平生所愛物娛玩由他人哀哉此里  
中同逝壯老均聖賢亦豈免聞道庶可珍

薊門行

行行光祿塞望望單于臺天寒水草盡萬里孤軍來中  
國多荒土窮邊何用開

巫山高

巴江西上巫峽深奇峰十二江之陰陽雲高臺不可尋  
但見丹楓碧樹攢幽林昔聞瑤姬在其下月為環玦風  
為襟空山久獨居偶感襄王心楚宮闕秋夢彷彿來同  
衾神仙會遇當有道豈效世俗成荒淫千秋遺賦應多  
恨暮雨蕭蕭猿自吟

上留田

有弟兄不見憐上留田行泣念彼先人上留田弟寒衣  
不蔽身上留田兄富出乘華軒上留田死而棺槨不全  
上留田他人為葬古原上留田我行見此孤墳上留田  
白楊一何翻翻上留田人生孰無弟昆上留田爾獨大  
義不敦上留田鄰人之歌悲不可聞上留田

董逃行

史侯稱臣董侯立山東義師烽火急羗兒夾輦奉西遷

百姓驅隨棄村邑，羣主苑中高作營。  
千里不復聞雞鳴，舊宮焚燒無片瓦。  
黃金盡出諸陵下，長安城頭日欲晡。  
董逃歌殘歌布乎。

碧玉歌

碧玉小家女，初無珠翠妝。  
感郎相顧重，朽質自生光。

堂上歌行

堂上歌歌南山主人為歡仰客顏。  
翠帷夜卷出兩鬟，移尊更飲花樹間。  
花樹間有明月客不醉歌不歇。



隴頭水

人間何處無流水偏到隴頭愁入耳夜雜羌歌明月中秋驚漢夢空山裏隴坂崎嶇九迴折聲隨到處長嗚咽欲照愁顏畏水渾前軍曾洗金創血回頭千里是長安征人淚枯流不乾

少年行

官侍長楊拜夕郎況憑內寵在椒房賜金十萬身無用乞作燕姬一日妝

其二

下直平明出禁門  
笑提博局伴王孫  
寶刀不敢將輸却  
明日沙場欲報恩

芳樹

葳蕤映華閨  
窈窕臨清沼  
風姿巧弄春  
露氣微含曉  
垂條拂過騎  
翳葉留歸鳥  
忽憶共攀人  
徘徊行獨遠

放歌行

泰山玉檢書成功  
芝房正奏甘泉宮  
漢家五葉號全盛

有似白日初當中雄雞天上啼清曙春滿咸陽萬家樹  
諸侯客子盡西來只道明時苦難遇褐衣不脫見至尊  
立談一刻皆承恩賡詩已上柏梁殿獻賦還過金馬門  
大道易登平若砥始信青雲纔尺咫共喜嚴徐得寵榮  
未容絳灌生讒毀丹詔仍聞訪草萊皇心務欲攬羣材  
嗟君猶在新豐邸日暮空歌歸去來

空城雀

空城雀何局促城頭飛城下宿百匝得一枝千啄逢一

粟衆雖隨啾啾所欲各易足不須羨彼珍羽禽翩翩高  
集珠樹林一朝身陷虞羅裏回首空城不如爾

相逢行

沽酒渭橋邊平陵俠少年相逢各有贈寶劍與金鞍

妾薄命

寂寞復寂寞秋風吹羅幕玉階有微霜桂樹花已落昔  
為卷衣女承歡在瑤閣棄魚感淚多當熊慙力弱寧知  
色易老難求黃金藥宮深去天遠憂思將何託君恩非

不深妾命自輕薄微軀願有報和親死沙漠

神仙曲

上清真人古仙子保神鍊魄從無始眉上霜毫如髮長  
幾見金烏日中死東遊不肯居蓬萊滄海頃刻飛黃埃  
金輿玉座儼何處蔚藍天上彌羅臺碧桃落盡花無數  
一笑虛空卷煙霧烏篆玄文世莫窺茂陵還掩蓬科露  
結客少年場行

結客須結遊俠兒借身報仇心不疑千金買得利匕首

摩挲誓許酬相知白馬繆胡纓行行人盡止朝遊洛北  
門暮醉秦東市感君在一言不惜為君死朱家曾脫季  
將軍田光終酬燕太子君不見魏其盛時客滿門自言  
一一俱銜恩魏其既罷誰復見養士堂中塵網遍始知  
結客難徒言意氣傾南山食君之祿有弗報何況區區  
杯酒間結客不必皆薦紳緩急叩門誰可親屠沽往往  
有奇士慎勿相輕閭里人

長相思

長相思思何長愁如天絲遠悠揚搖風曳日不可量未  
能絆去足唯解結離腸關山碧雲看欲暮空幃坐掩茱  
蘭香長相思思何長

君馬黃

君馬黃我馬玄君馬金匱匣我馬錦連乾兩馬喜遇皆  
嘶鳴何異主人相見情長安大道可並轡莫誇得意爭  
先行搖鞭共踏落花去燕姬酒壚在何處

團扇郎

團扇團且潔人言似明月明月豈得如長圓不曾闕

楊白花

楊白花太輕薄不向宮中飛却度江南落美人踏踏連  
臂歌山長水濶奈爾何奈爾何春欲晚何不飛去仍飛  
返洛陽樹多啼鴉愁殺人楊白花

門有車馬客行

門有車馬客乃是故鄉士昔別各壯顏今見不相似上  
堂敘情親拜跪出妻子對案未能食歷歷問桑梓當時



同遊人十有八九死松栢長新墳荆棘生故址歡言方  
未終悲感還復始因思興謝端歎息不能止

估客詞

上客荊州商小婦揚州娼金多隨處樂不是不思鄉

擢歌行

溶漾漢潭清寥荷趁浪平船輕知體弱簪滑見鬟傾落  
日懸江思浮雲結浦情去從千葉隱歸愛一花迎吳歛  
并子夜誰似棹歌聲

鷄鳴歌

北斗城頭北斗低萬家夢破一聲雞馬啼踏踏車轆轤  
闕下連趨市中逐雄雞安得噤爾聲利名少息世上爭  
漫漫夜長人不驚

華山畿

華山畿牛車止不同生可同死棺開棺開與郎去來

長安有狹斜行

長安有狹斜狹斜僅容騎路逢兩俠童迴鞭問君第君

第渭橋西易覓難復速長子侍溫室次子籍金閨少子  
備宿衛光耀與兄齊三子每來返雜沓擁輪蹄大婦彈  
鷓鴣中婦舞前溪小婦勸杯酒能唱白銅鞮丈人莫遽  
起庭樹未烏棲

雙桐生空井

交生碧玉樹竝覆黃金井根通夕潤深葉帶朝光冷應  
有感秋人時來鑑愁影

征婦怨

良人不願封侯印虎符遠發當番陣幾夜春閨惡夢多  
竟得將軍軍覆信身沒猶存舊戰衣東家火伴為收歸  
妾生不識邊庭路尋骨何由到武威紙幡剪得招魂去  
只向當時送行處

襄陽樂

門前黃柳鴉雛宿羅幌低垂婢擎燭懸璫結珮略妝成  
日暮相邀漢江曲水靜花寒月小明舟中樓上鬪歌聲  
腸斷年年大堤路南商行過北商行

飲酒樂

七絃五絃角奏一觴兩觴羽行且樂眼中人聚莫憂頭  
上天傾

鳳臺曲

飛裙織霧秋痕薄星漢低宮花漠漠瓊臺夜寒閉羸女  
驚管參差隔煙語瑤京舊侶招遠遊人間帳冷鴛鴦愁  
海影無塵月如夢仙骨不欺鸞背重衰蘭泣露空秦苑  
叢玉聲微彩霞遠

美女篇

美女婉清揚，白晳纖且長。艷色照上國，不殊古姬姜。巧笑發令姿，芳詞吐柔腸。耀首有何物，黃金作釵梁。珥懸礪，硃珠褱帶藿。綉香新服製，羅紈光輝麗。青陽上袂繡，蛺蝶下裙織。鴛鴦姍姍步，春風乍見驚。欲翔雖有楚，大夫善賦焉能詳。豈徒騁妍媚，況乃持貞良。家居闔高門，宛在城中央。過者共傾慕，日晏停上襄。借問誰氏子，無非金與張。蹇修豈不勤，通辭重珪璋。中懷非所託，鴈幣

徒相將永宵歎遲回起倚東西廂君子苟未得年徂諒  
何傷

將軍行

將軍結髮從鞍馬新領前軍號橫野面謾不數屠狗兒  
負勇曾擒射鵬者狼星掃天芒角斜大旗獵獵吹風沙  
黃金傾盡養部曲匈奴未滅何為家前日賢王五千騎  
直入朝那殺邊吏天子初聞怒赫然出師誓奪河南地  
五營材官元自多詔書未須徵七科已御明堂推畫轂

還開武庫授彫戈  
灞陵原頭軍晚發  
北出雲中與高關  
單于一夜六驃逃  
大漠無人唯漢月  
塞下從茲烽火稀  
朝臣共賀震皇威  
人生寧似功成樂  
白日長安鼓吹歸

長安道

長樂鐘聲動平津  
樹色開中郎長戟衛丞相  
小車來新成  
賜將第更築候神臺  
誰念公車客空懷作賦才

洛陽陌

九陌看春光紅塵起相接  
白玉車中郎綠珠樓上妾  
柳



迷臨水影花暎當壚頰日暮過銅駝相逢盡豪俠

悲歌

征途險巇人乏馬饑貧少不如富老美遊不如惡歸浮  
雲隨風零亂四野仰天悲歌泣數行下

邯鄲郭公歌

郭公舞郭公舞天子無愁亦無苦醉後君臣一笑看鄴  
宮長夜鼕鼕鼓郭公郭公爾莫舞不解平城圍竟作長  
安虜高山推為一杯土

車遙遙

鷓鴣啼霜海城白  
征夫趣裝牛上輓  
天生兩轂轉長途  
那得令君不為客  
出門已遠第一程  
耳中鳴鐸漸無聲  
房戶寧嗟寂寞守  
山川唯念苦辛行  
欲車不行願車覆  
還愁損我車中玉  
安得身如芳草多  
相隨千里車前綠

楚妃歎

章華臺前楚江水  
月色墮煙鳥欲起  
六宮不敢解羅衣  
獵火照山君未歸

神絃曲

秋燈畫壁熏煙埃石馬汗流神下來花衫娑娑絃切切  
旋風吹幡愁百結雌狐學拜戴髑髏鬼箭射創血灑秋  
老鴉飛散巫嫗泣苦篁嘯雨溪幽幽

白紵詞

白紵出自吳女工著來色與素體同舞時偏向江渚宮  
長袖拂起微有風觴催管促四座中攬裾徘徊慘曲終  
玉階夜寒零露濃

其二

出後閣臨前楹舞衣皎皎潔且輕飄如白雲向空行迴  
腰流目君已傾華燈吐燄欺月明喧譁不聞遺珮聲采  
萸實紅蘭葉紫千秋歡樂長如此妾身得向君前死

阿那瓌

牛羊草漫野大帳天山下十萬控弦兒聞笳齊上馬

江南思

妾本南國姝父母愛如珠貌豈慙明鏡身纔稱短襦學

成采蓮唱曉出橫塘上舟小復身輕隨風雨搖蕩歸時  
曲岸傍恰見貴遊郎輟歌欲轉棹花淺不堪藏將嗔却  
成哂相問那能隱雖憐郎意深終嫌妾家近回首各盈  
盈南湖月又生煙波三十里都是斷腸情

銅雀妓

鄴宮已罷幸歌舞尚如期誰知看月夜却是望陵時薌  
澤銷羅薦松風吹總帷妾身未得死寧當憂色衰

猛虎行

陰風吹林鳥鵲悲猛虎欲出人先知目光瞳瞳當路坐  
將軍一見弧矢墮幾家插棘高作門未到日沒收猪豚  
猛虎雖猛猶可喜橫行只在深山裏

湘中絃

涼風嫋嫋月粼粼竹色蘭香秋水濱一夜猿聲流淚盡  
黃陵祠下泊舟人

獨不見

白日沉大荒北風下天霜羅幃猶苦冷何況戍遼陽別

時秦槐青今復胡草黃紅淚常自滋非因效啼妝駕機  
促夜響龍鏡掩晨光相思獨不見時久愈難忘

豔曲

日莫淇水上折花行見歡鴛鴦蘇合彈騷裊鏤衢鞍

其二

當時贈芍藥今日歎蘼蕪少年不相顧唯愛執金吾

羽林郎

十五能挽弓入衛葡萄宮武皇深假借父有沒邊功禿

衿繡襦短馬逸雙銜斷纜出關雞坊還過射熊館笑擲  
朱提銀娼樓爛醉春歸時衝市過辟易九衢人橫行自  
無避司隸休相忌明日浚稽山為君遮鐵騎

燕燕于飛

燕燕何處飛相見江南路  
鶯香細雨春柳色芳煙暮  
纔從箔外歸復向舟前渡  
莫入未央宮身輕有人妒

浮游花

宛宛庭中花狂風忽吹去  
無涯上入逍遙之雲天下沒



慘淡之泥沙開落本同何足歎升沉偶異自堪嗟

野田行

白楊樹下誰家墳火燒野草碑無文路傍尚卧雙石馬  
行人指是故將軍當時發卒開陰宅千車送葬城東陌  
子孫今去野人來高處牧羊低種麥平生意氣安在哉  
棘叢暮雨棠梨開百年富貴何足恃雍門之琴良可哀

壯士行

無險非高山無勇非壯士半夜殺風來劍寒燈欲死

邯鄲才人嫁為廝養卒婦

妾能擲趙瑟舊得君王眷更衣直夜房侍酒登春殿出  
宮非故顏里婦猶相羨叢臺罷往夢破屋流螢見末路  
多若斯紛紛貴成賤

秋風引

嗟爾秋風胡為來哉奏商律兮瑟颼而悲哀叩喬柯而  
隕葉掃廣路以清埃入班姬之永巷過襄王之高臺瑤  
琴自鳴羅幃齊開馬蕭蕭而嘶起鴻嗷嗷以翔迴使崩

雲駭浪振蕩於白日兮忽欲去而徘徊客有懷鄉失職  
而對此者恨盈襟而難裁但欲變天地之搖落不知感  
節序之摧頽秋風生歸去來

涼州詞

蓬婆城下淨無花慘慘黃雲漠漠沙卷葉誰將番曲奏  
白頭都護亦思家

其二

關外垂楊早換秋行人落日旆悠悠隴頭高處愁西望

只有黃河入海流

虞美人曲

明月帳中泣悲風營外歌  
彷徨夜驚起何事楚人多迴  
燈擁綠髻向劒處青蛾  
致命自無恨君王其奈何

築城詞

去年築城卒霜壓城下骨  
今年築城人汗灑城下塵  
大家舉杵莫住手城高不用官軍守

永嘉行

帝衣濺血忠臣死五部初興屠各子宣陽門外曉吹笳  
持戟誰為衛宮士滿城草綠代馬嘶內家散作軍中妻  
六璽相隨渡河去月明歸夢遂成迷萬里中原非典午  
至今人說王夷甫

神女宛轉歌

駐君舟相見盡綢繆已遣大姬傾鑿落復令小婢進瑩  
篴歌宛轉宛轉意何長願為灰與火同泛玉爐香

其二

解妾珮相貽慰離異愁逐朝霞天際生歡隨秋水江頭  
逝歌宛轉宛轉情相續願為絃與軫共奏瑤琴曲

東門行

出東門暮歸來入室四壁空突中無煙甑生埃弱妻蓬  
頭稚子瘦使我心下忽有哀安能學東方生空抱國士  
才身長七尺苗編貝索米不得取笑咍雞鳴東門早欲  
開仗劍當遠去不乘駟馬不復迴妻前挽衣言君可棄  
妾奈此呱呱孩君莫憂無糧田中已生稂君莫憂無棠

機中布成尚可裁不須苦慕富貴富貴多有害  
畱賤妾與君生同居死即共作山下灰  
吾欲行為徘徊仰視蒼天重咄哉

大全集卷一



欽定四庫全書

大全集卷二

明 高啓 撰

樂府

愛妾換馬曲

出帷掩紅袂離廐結青絲  
我取躡雲足君憐羞月姿  
惟當樹功業詎必戀恩私  
回首各已遠春山將暮時

美人磨鏡詞

匣中舊鏡龍蟠背昏盡如同月逢晦尋得街頭負局翁  
粉鉛和汞拭青銅須臾瑩徹無纖翳試整朝來暗梳髻  
光明還在只如新悔向塵埃久相棄明日照儂自畫眉  
不須問郎宜不宜

朝鮮兒歌

朝鮮兒髮綠初剪齊雙眉芳筵夜出對歌舞木綿裘軟  
銅鐶垂輕身回旋細喉嚨蕩月搖花醉中見夷語何須  
問譯人深情知訴離鄉怨曲終奉足拜客前烏啼井樹

蠟燈然共訝玄菟隔雲海兒今到此是何緣主人為言  
曾遠使萬里好風三日至鹿走荒宮亂寇過雞鳴廢館  
行人次四月王城麥熟稀兒行道路苦啼餓黃金擲買  
傾裝得白飲分餐趁船歸我憶東藩內臣日納女椒房  
被褱翟教坊此曲亦應傳特奉宸遊樂朝夕中國年來  
亂未鋤頓令貢使入朝無儲皇尚說居靈武丞相方謀  
卜許都金水河邊幾株柳依舊春風無恙否小臣撫事  
憶昇平尊前淚瀉多於酒

野老行送陳大尹

桑扈初鳴麥花落大家小家蠶滿箔村中無吏夜捉人  
老身醉歸行失脚自從明府一下車短衣糲飯即有餘  
姓名免籍弓弩手新婦辟纊兒讀書縣門前頭柳飛絮  
春風又隨官馬去雞鳴相送拜道邊願公受取一大錢  
秋江曲送顧使君

秋江月滿秋潮大江上行人待潮過別離休說渡江難  
半日順風船穩坐楚江茫茫葭茨平使君來時雄雉鳴

子弟從軍隔江去幾家猶住夕陽城水田雖荒飯常足  
芟米夜舂二十斛誰道繁華不及前戶無征稅官無獄  
渡江渡江君莫留江北樂似江南秋

湖州歌送陳太守

草茫茫水汨汨上田蕪下田沒中田有麥牛尾稀種成  
未足輸官物侯來桑下搖玉珂聽儂試唱湖州歌湖州  
歌悄終闕幾家愁苦荒村月

秦箏曲

嬌絃細語發硃羅臂動玉釧鳴相和關雲隴月愁思多  
愁思多聽此曲停蜀琴罷燕筑

從軍行

關中惡少年召募去防邊匈奴入寇塞將軍下自天揚  
旌三道出列格五營連龍城望兵氣馬邑斷人煙星攢  
烽夜舉月偃陣朝圓渴飲疏勒水饑餐屬國羶名勇單  
于憚功多天子憐寧令寶車騎獨擅勒燕然

大梁行

大梁四面平如砥西去咸陽一千里魏王此地昔為都  
宮闕中天碧雲起車聲輶輶夜未休帶甲十萬名蒼頭  
撞鐘列鼎宴上客奉金走幣連諸侯信陵真是賢公子  
富貴不驕天下士已訪侯嬴到里門復迎朱亥經屠市  
傾身折節世莫同緩急竟賴斯人功邯鄲秦軍一摧破  
七國震動聞英風古城重過為搔首幾度秋風落楊柳  
沼上應無鴻鴈來苑中只有狐狸走立馬塵沙日欲昏  
悲歌感慨向夷門豪華多少同銷歇獨有高名今尚存

東飛伯勞歌

前飛蜻蜓後飛蝶  
桃葉楊枝每相接  
誰家季女弄春妍  
披煙映日窗戶前  
金雀雙釵翠羽扇  
纈屏黼帳文羅薦  
嬌羞年幾十五多  
將呈復隱奈愁何  
流暉倏沒百花暝  
空持可憐誰作竝

春江花月夜

皓月金波滿奇花玉樹新  
浮輝與流艷併弄一江春  
還持誰可比結綺閣中人



踏歌行

香塵和露踏成泥  
花下風寒鬢脚低  
夜靜高樓有人聽  
起頭一句唱教齊

子夜四時歌

白白復朱朱  
芳條罨繡襦  
摘來隨女伴  
賽鬪不曾輸  
紅妝何草草  
晚出南湖道  
不忍便回舟  
荷花似郎好  
堂上織流黃  
堂前看月光  
羞見天孫度  
低頭入洞房  
空幃擁爐坐  
夜冷微紅滅  
郎意似殘灰  
無因得重熱

迎送神曲

薦芳兮奠醑，斲冰為梁兮葺荷以為宇。神不來兮孰與處，空山愀兮暮多雨。渺吾望兮瀟湘雲冥冥兮水茫茫，有美人兮在堂。盍歸來兮故鄉。

導赤鯉兮從玄鼉，冷風回兮水驚波。儼靈旗兮來下巫，撫節兮安歌。安歌兮未急，脩迴輶兮山之側。南有淵兮北有湫，神不留兮我心憂。願歲來兮惠我秋。

有所思

有所思今安在煙霞迢迢隔南海昔年遺我翡翠裘篋  
中久閉銷光彩宛如神仙在瀛州乘濤欲至風引舟同  
心之人乃離阻嗟我處此將何求

吁嗟篇

惻惻抱深隱靡靡踰崇丘凜凜歲欲徂役役車未休不  
辭車未休但傷歲莫留窮陰蔽九野徒旅同時憂豺虎  
當路啼猿猱出林遊我饑雪作糧我寒又無裘徒思陽  
春日誰返羲和輶天時自有常淚下還復收

擊筑吟贈張贊軍

擊筑上君堂君心不可忘  
哀聲流易水憤氣激咸陽  
不向諸侯座寧來刺客場  
今朝特前奏為我一停觴

苦哉遠征人

悠悠荷戈子謫發事遠征  
遠征無窮期千里萬里程  
瞻斗知鄉遠覽物悟歲更  
霜露鏹肌膚弊鎧蟣虱生  
况茲三邊虜驕黠未易平  
聞笳已心摧赴刃仍骨驚  
軍興有嚴誅賤命顧自輕  
區區在行間敢望竹帛名  
奈何久不

還主將功未成誰憐城南室思婦感鵲聲

鑿渠謠

鑿渠深一十尋鑿渠廣八十丈鑿渠未苦莫嗟吁黃河  
曾開千丈餘君不見賈尚書

荊門壯士歌

水洶洶冰差差荊門葉黃杪秋時上有騰攫之猿猱下  
有饒嚼之蛟螭悲哉此路難孰敢徑渡之三撫髀壯士  
起劍風騷勞髮上指仰天長歌不見星哀鴻夕叫雲冥

冥

城虎詞

候潮門開啼早鴉有虎忽入居人家母兒畏竄雞犬伏  
排籬突戶誰能遮獰風動樹初哮吼驚起東營捉生手  
怒拔長戈試一撻目光落地張魂走南山藜藿深冥冥  
白日橫行誰敢撓胡為離窟來城市牙爪雖全不能恃  
君不見壯士遭急縛失路窮時亦如此

寒夜吟

月下凍痕生綠井，隔簾霜片飛無影。  
樹枝風息轉凝寒，愁人如鳥棲未安。  
夜短夜長應獨覺，熒熒殘燭鳴鳴角。

戍婦詞

妾在當奉姑，即行當報君。  
男女各有役，死生從此分。

羈旅行

馬頭北風吹地白，手冷時驚墮鞭策。  
隻堠欲來雙堠過，客程不盡關山多。  
狐狸縱橫古城壞，旗折官亭無酒賣。  
土風處處殊故園，鄉音只聞僮僕言。  
天涯歲晚無相識，

囊金已空歸不得暝投人家自炊黍土屋青燈鴈啼雨  
此時暫解羈旅憂夢與家人夜深語人生出門即苦辛  
何況長為萬里身遠遊縱得名好不如貧賤鄉中老

小長干曲

郎采菱葉尖妾采荷葉圓石城愁日暮各自撥歸船

春江行

春江南北疑無岸綠草綠波連不斷一女紅妝出浣紗  
恰如鏡裏見桃花袂衣猶冷過寒食雲度春陰半江黑



浦口風多潮正深輕舟搖蕩似人心  
鷓鴣暮啼歸路遠  
飛絮茫茫楚王苑

寄衣曲

郎寒甚妾寒持衣向燈泣不是手縫遲  
綿多針線澀

其二

賜袍非不煖妾製稱郎身寄去龍堆遠  
端愁到已春

廢宅行

鳴珂坊裏將軍第列戟齊收朱戶閉  
里媼逢人說舊時

有廬被奪廣園池今年沒入官為主散盡堂中義宅兒  
廚煙久斷無梁肉羣鼠饑來入鄰屋官封未與別人居  
日日閒苔雨添綠曲閣深沉接後房畫屏生色暗無光  
尋常不敢偷窺處守卒時來拾墜璫春風多少奇花樹  
又有豪家移得去

青樓怨

浴金熏爐鏤玉奩蘭香今夜為君添烏棲黃昏烏起曙  
纔見道來還道去

聞角吟

驚起黃榆塞下鴻一聲鳴軋戍樓空此時吹動關山意  
十萬征人歸夢中玉帳彎弓夜初起月白不知霜似水  
餘聲散作滿天愁風吹不入單于壘

刺促行

刺促復刺促天高白日速黃鵠長苦饑烏鳶飛食肉促  
刺復刺長途多荊棘但見今人行不逢古人跡

牧牛詞

爾牛角彎環我牛尾禿速共拈短笛與長鞭南隴東岡  
去相逐日斜草遠牛行遲牛勞牛饑惟我知牛上唱歌  
牛下坐夜歸還向牛邊卧長年牧牛百不憂但恐輸租  
賣我牛

捕魚詞

後網初沉前網起夫婦生來業淘水忽驚網重力難牽  
打得長魚滿船喜不教持賣去南津且向江頭祭水神  
願得年年神作主無事全家卧煙雨不論城中魚貴賤

換得酒歸儂不怨

養蠶詞

東家西家罷來往晴日深窗風雨響二眠蠶起食葉多  
陌頭桑樹空枝柯新婦守箔女執筐頭髮不梳一月忙  
三姑祭後今年好滿簇如雲繭成早檐前繰車急作絲  
又是夏稅相催時

射鴨詞

射鴨去清江曙射鴨返迴塘晚秋菱葉爛煙雨晴鴨羣

未下媒先鳴草翳低遮竹弓彀水冷田空鴨多瘦行舟  
莫來使鴨驚得食忘猜正相鬪背啞啞毛襪襪潛機一  
發那得知

伐木詞

竹擔挑多兩肩赤礪斧時尋澗邊石老夫氣力秋漸衰  
易斫喜有枯林枝白雲無人暗空谷遠聲丁丁如啄木  
暮歸待伴不獨行前途虎多荆棘生長年不曾到城府  
聞比山中路尤阻

打麥詞

雉雛高飛夏風煖行割黃雲隨手斷疎莖短若牛尾垂  
去冬無雪不相宜場頭負歸日色白穗落連枷聲拍拍  
呼兒打曬當及晴雨來怕有飛蛾生卧驅鳥雀非愛惜  
明年好收從爾食

采茶詞

雷過溪山碧雲煖幽叢半吐槍旗短銀釵女兒相應歌  
筐中摘得誰最多歸來清香猶在手高品先將呈太守

竹爐新焙未得嘗  
籠盛販與湖南商  
山家不解種禾黍  
衣食年年在春雨

賣花詞

綠盆小樹枝枝好  
花比人家別開早  
陌頭擔得春風行  
美人出簾聞叫聲  
移去莫愁花不活  
賣與還傳種花訣  
餘香滿路日暮歸  
猶有蜂蝶相隨飛  
買花朱門幾迴改  
不如擔上花長在

洞房曲



洞房香吐合昏花月轉勾闌啼乳鴉今宵有酒留君醉  
不信娼家勝妾家

待月詞

漏板敲愁夜驚冷露井桃花溼無影海風吹星銷碧煙  
翠妃妝遲鏡未懸素鸞不來桂香死雲外紫簾呼夢起  
瓊樓欲開天半紅徘徊望拜娥池東蘭闥未返燈寒後  
恰似前宵待郎久

惜花歎

惜花不是愛花嬌，賴得花開伴寂寥。  
樹樹長懸鈴索護，叢叢頻引轆轤澆。  
幾回欲折花枝嗅，心恐花傷復停車。  
每來花下每題詩，不到花前不持酒。  
準擬看花直盡春，春今未盡已愁人。  
纔留片萼依前砌，全落千英過別鄰。  
懊惱園中妒花女，畫簷不禁狂風雨。  
流水殘香一夜空，黃鸝魂斷渾無語。  
縱有星星在薜衣，拾來已覺損光輝。  
只應獨背東窗卧，夢裏相隨高下飛。

照鏡詞

君家青銅鏡價重比黃金空持照人面不持照人心

田家行

草茫茫水汨汨上田蕪下田沒中田有禾穗不長狼籍  
只供鳬鴈糧雨中摘歸半生溼新婦春炊兒夜泣

憶遠曲

揚子津頭風色起郎帆一開三百里江橋水柵多酒壚  
女兒解歌山鷓鴣武昌西上巴陵道聞郎處處經過好  
櫻桃熟時郎不歸客中誰為縫春衣陌頭空問琵琶卜

欲歸不歸在郎足郎心重利輕風波在家日少行路多  
妾今能使烏頭白不能使郎休作客

金井怨

照水羞見影汲水嫌手冷閒立梧桐陰烏啼秋夜永

送客曲

送客車在門勸客杯在手明日長安花今夜宜城酒願  
客飲此勿復辭我無黃金為客壽人生無處無弟兄鄉  
里刺促誰知名賣書買得百金劍有身須向關山行馬

四蹄車兩轂行人欲發休躑躅嚶嚶雞鳴赤日旭

里巫行

里人有病不飲藥神君一來疫鬼却走迎老巫夜降神  
白羊赤鯉縱橫陳男女殷勤案前拜家貧無殺神勿怪  
老巫擊鼓舞且歌紙錢索索陰風多巫言汝壽當止此  
神念汝虔賒汝死送神上馬巫出門家人登屋啼招魂

主客行

主人楚歌客楚舞落日黃雲鴈聲苦笑拂腰間寶劍光

美人滿堂色如土大兒北海人中奇小兒能讀曹娥碑  
相逢且莫歎貧賤但願有酒無別離君不見平原墓上  
生秋草國士無窮道傍老

春夜詞

杏煙溼鬢鞦韆下銀蠟光寒曲屏畫數漏閒過每睡時  
月明微見墮游絲欲歸自踏娉婷影風動玉釵花亦冷  
屋貯嬌愁鎖幔紗青絲嘶騎醉誰家管絃不動空臺榭  
夢與烏衣語中夜

新絃曲

舊絃解新絃張永絲牽愁六尺長寬急頻從指邊聽金  
鴈參差移不定新絃響高調易促不如舊絃彈已熟憐  
新厭舊妾恨深為君試奏白頭吟他日愁如舊絃棄泣  
向羅裙帶頭繫

竹枝歌

蜀山消雪蜀江深郎來妾去關歌吟峽中自古多情地  
楚王神女在山陰

其二

魚復浦上石纍纍恰似儂心無轉迴  
船歸莫道上灘惡  
自牽百丈取郎來

其三

江水出峽過夔州長流直到海東頭  
郎行若有思家日  
應教江水復西流

其四

躑躅花紅鴟鵂飛黃牛廟下見郎稀  
大扁攤錢賣鹽去



短釵簪葉負薪歸

其五

妾愛看花下渚宮  
郎思沽酒醉臨邛  
春衣未織機中錦  
只是長絲那得縫

其六

楓林樹樹有猿啼  
若箇聽來不慘悽  
今夜郎舟宿何處  
巴東不在定巴西

轉應詞

雙燕雙燕去歲今年相見往來東舍西家銜得泥中落花  
花落落花落人在暮寒池閣

其二

疎雨疎雨綠滿蘼蕪洲渚江南相憶故人遠水遙山暮  
春春暮春暮風急畫船難渡

五雜組

五雜組駢背羈往復還渡口船不獲已非少年

其二

五雜組錦繡旗往復還更戍兒不獲已遭亂離

五噫歌

弔梁伯鸞墓

顧瞻亭臯兮噫丘墳有蒿兮噫嚮春亦勞兮噫危邦可  
逃兮噫先生何高兮噫

疊韻吳宮詞

筵前憐嬋娟醉媚睡翠被精兵驚升城棄避愧墜淚

鶴媒歌

鶴媒獨步荒陂水仰望雲間不飛起遠看過鳥下南汀

鼓翼相迎似相喜共為羽族生水鄉暫從飲啄無猜防  
草盾俄開中潛弩弋師歡笑媒矜舞嗟爾高潔非凡禽  
胡為徇食移此心受人馴養忘遠舉好陷同類機腸深  
嗚呼世間幾人號君子得利相傾亦如此

牛宮詞

豕豢于豎雞棲于埒嗟爾烏犍何所止斯歲聿云暮雨  
霜以風乃築環堵以為爾宮既用爾力宜恤爾寒庇處  
密固我心孔安

照田蠶詞

東村西村作除夕高炬千竿照田赤老人笑祝小兒歌  
願得宜蠶又宜麥明星影亂棲烏驚火光辟寒春已生  
夜深然罷歸白屋共說豐年真可卜

琴操

風樹操

予自傷早失恃怙而作

朝風之飄飄兮維樹之搖搖兮吾思親之飄飄兮夕風  
之烈烈兮維樹之揭揭兮吾思親之悵悵兮樹之有風

猶可息兮吾之無親終不可復得兮

之荆操

子思秦伯之德而作

粵我有土岐山之下孰是營之維我考祖今我于邁自  
岐徂荆豈不懷歸念我弟兄民勿我思我斯安只國已  
有後先君季子

登丘操

登丘丘有懷而作

驅車兮與馬蹇君行兮胡為乎在中野登彼兮崇丘下  
茫茫兮九州思君子兮不得與駕以遊山有出雲兮木

亦有柯我將歸兮憂之如何

望歸操

袁周復子死於虎而作

兒旦而出于山之麓兮兒夕不歸在虎之腹兮我往無  
所榛蒙蘢被谷兮嗟爾耽耽弗食我豕犢兮穴亦有子  
胡寧使我獨兮

辭

望虞山辭

虞山我我今出雲油油胡斂其施兮弗雨九州下有蛟

龍兮海波橫流誰使子來兮從伯氏以遊朝于隣兮望  
岐周國有祀兮又何求唐虞逝兮道阻修慚德興兮干  
戈日休我思夫人兮心焉孔憂

放鶴辭

登支遁放鶴亭而作

放鶴去當高飛啄莫爭難驚食遊莫近虞羅機雲山海  
嶠堪來往明月千秋待爾歸

弔伍子胥辭

覽勾吳之故墟兮灌莽鬱其龍蔥館娃廢而為沼兮歸



伍胥之遺宮奚千祀而勿毀兮繫若人之死忠昔窮逋  
而渡江兮奮孤跡於羈旅旣入郢而雪恥兮又棲越而  
攘侮使彼吳之強大兮非夫子而孰為何夫差之自喜  
兮遽忽戒而荒娛陳昌言之惘歎兮實不忍視國之阽  
危衆以子為巨信兮肆讒辭之詆欺夫豈不能全身遠  
適以自庇兮顧先王之舊德卒待隕而何言兮恨終不  
能悟君之嬖惑載鴻夷兮浮游魂惴惴兮在中流江神  
念子兮哀憤鼓洪濤於高秋嗟君子之出輔兮孰不願

為伊臯使言從而志行兮致雍熙之陶陶何齟齬而多  
患兮惟重華之不可以屢遭鄂侯諍而就醢兮龍逢諫  
而見屠蓋自古而有之兮匪夫子獨罹乎此辜身雖歿  
而義安兮又舍是將焉適彼循默而苟容兮寧獲免乎  
泚額想子猶念夫故都兮或乘雲而來歸顧荆棘之多  
露兮應攬涕而歔歔余亦何為而感慨兮懼直道之墜  
也聊陳詞而表烈兮亦邦人之志也

三言

梧桐園

桐花香桐葉冷生宮園覆宮井雨滴夜風驚秋鳳不來  
君王愁

三四言

王伯敬歌

舟初維琴始薦驛亭邊夜相見歌宛轉情綢繆解環珮  
彈箜篌歌易闌情難歇江波寒墮明月綠壺再傾芳音  
欲違譬彼林鳥逢晨各飛羅衣沾霜城烏忽起明日相

思孤棹千里

大全集卷二

欽定四庫全書

大全集卷三

明 高啓 撰

五言古詩

擬古 十二首

纂纂牆下李  
芄芃陂中麥  
浩浩望遠塗  
悠悠思行客  
客行歲已盈  
紆鬱傷我情  
始知失羣鴻  
不若求友鶯  
登山知天高  
臨流識川阻  
不遣懷同心  
那知別離苦  
別離不

可久寂寞不可守自傷紅顏子相思成皓首朝日如不  
晚行人會當返

其二

嵯峨雲間樓俯視層城陰綺戶相洞開清飈拂羅襟上  
有離居婦哀歌撫弦琴不知中怨誰掩抑一何深初為  
郢中唱再奏邯鄲吟不惜努力歌寫作絕代音風吹落  
君耳萬里知愁心曲盡思寂寥青天日西沈安得化彩  
鳳飛去巫山岑

其三

出郭見丘墓纍纍滿山阿四海能幾人逝者何其多封  
樹日蕭條狐狸走蓬科英靈無人弔收兒暮來歌浮華  
一世中倏若飛鳥過生時不肯飲死沒將如何

其四

離離白雲翔悠悠清川逝天地如傳郵閱人以為世良  
時難再得游樂咸陽中咸陽名都會衣冠集王公南山  
對魏闕嘉樹何龍蔥九衢十二城逶迤迴相通衛霍開

上第車馬爭春風娛意勿自惜當至百年終

其五

東井不可飲威弧孰能張虛名竟何用千古同悲傷與  
君初結歡金石比中腸恩情忽乖分相望阻川梁閨門  
尚難越况彼道路長不如雲中鴈迴飛自隨陽

其六

促織何嘖嘖空庭寒露白蘭蕙辭故芳高梧銷華澤閨  
中覽物變感歎當此夕引領望遠人天河西南隔舟行



詎離水針運恒依石君雖有棄捐妾心誓無易

其七

置酒北堂上歡言宴嘉賓嘉賓復為誰相過盡朱輪中  
庖炙肥牛登俎悉異珍左右燕趙姝羅綺驕上春清謳  
雜哀吹響激迴高旻主勸客復酬中抱各以伸盛年易  
傾謝為樂願及辰請看舊同遊半作泉下人無為苦刺  
促長憂賤與貧

其八

美人一相見遺我白玉環上有雙雕龍遊戲在雲間持  
此感深意佩結無時間玉以比貞潔環以明不絕雲龍  
永相從誰能使離別

其九

秋至衆芳歇芙蓉獨鮮妍朱華照綠水日暮涼風前采  
折難遠贈相看自嬋娟孤艷豈足賞後彫良可憐

其十

明星爛東方北斗亦已旋獨宿悲夜徂空牀藉蘭荃雞

鳴整環珮思奉君子筵君子行未歸新妝為誰妍意疎  
覺去遙咫尺越與燕含情乏彤管何以寫中悵君如綆  
上瓶妾若井底泉不垂汲引惠澄瑩徒終年

其十一

人生一漚水所欲乃無涯志意苦未畢容華忽然衰天  
地有終壞誰能待其期聊為一日歡勿作千載悲神仙  
俱好飲得醉復何疑

其十二

黃鳥鳴春陽流芳滿西園攀條日已暮悵惋不能言禦  
寒必重裘涉道須雙轅離居非君子何以解憂煩煩憂  
日已積佳期日已失思君如蓬萊可望不可即區區儻  
見察憔悴甘自畢

寓感 二十首

天旋海水運日月馳奔輝不知此往來伊誰幹其機諒  
由任元氣推遷不能違人生處宇內行止無定依唯當  
乘大化逍遙隨所歸

其二

雞鳴一警旦陽烏已東昇羣動紛自起各欲赴其生  
餓蠖王中出棲禽林外驚蒼蠅一何微黝黕亦飛鳴  
人生信多故安得免營營

其三

盛衰迭乘運天道果誰親自古爭中原白骨遍荆榛  
乾坤殺機流禍及蒸民生聚亦已艱一朝忽胥淪陽  
和既代序嚴霜變肅晨大運有自然彼蒼非不仁咄咄堪

歎嗟滄溟亦沙塵

其四

美女生貧家光艷人未識遠聘入楚宮揚蛾欲傾國朝  
遊瓊臺上夕侍金輿側奉歡擬十齡秋風失顏色銜恩  
歸永巷貞意徒寂默高高天上星墮作水底石人事盡  
如斯推移歎何極

其五

叢蘭生路隅馥馥有奇香路隅多行人采掇成摧傷深

林雖幽獨秋至靄餘芳托根在得所君子蹈其常

其六

蚩蚩此羣氓幾人出其傳誰云抱智慮乃足資勞憂晨  
秣思遠騁宵披務窮搜懷古復慨今百念紛相投膠擾  
得喪間若與方寸仇安知廣成子冥卧崑崙丘無營亦  
無想八表獨神遊

其七

大道本夷直末路生險巇杯酒出肺肝須臾起相疑田

蚡排竇嬰趙高誣李斯傾擠不少假權寵實留基鑿井  
當得泉種桑會成絲禍福皆自致天道信難欺出亡無  
所舍千載使人悲

其八

志士徇功業貪夫詫輕肥亦有逃羣子矯矯與時違彼  
此更共笑不知誰是非達人體自然出處兩忘機浮雲  
遊天表舒卷有餘輝

其九



攬轡登太行遙望洛北州  
峭嶺正西峙黃河復東流  
百城無遺堵雲煙莽相繆  
朝作冠蓋塲暮為狐兔  
丘昔人爭此地干戈迭相讐  
當其得意時連陌擁鳴騶  
百年奄忽盡魂魄空來游  
曷見采芝叟冥栖無所求

其十

桃李初不語鳳凰豈長喧  
末俗矜辯議窮口禍之源  
所以國武子殺身由盡言  
妙哉無為訓默默道斯存

其十一

人言異草木不若松柏壽欲於百年間辛苦圖不朽形  
質天所畀名姓吾自取形名兩未立悲我竟何有不能  
知我先奚暇恤我後遺臭與流芳冥然付杯酒

其十二

短褐乘輶輅孤裘駕文車西門與北宮窮達一何殊彼  
達矜已智此窮媿身愚東郭發至言兩惑各以祛厚薄  
有定命巧拙果誰歟歸卧掩蓬室道存何所吁

其十三

駑馬放田野志本在豐草偶遇執策人驅上千里道顧  
非乘黃姿豈足辱君早負重力不任哀鳴望穹昊奈何  
相逢者猶羨羈絡好

其十四

頽陽在川上玄蟬夕鳴悲嫋嫋風起波翻翻葉辭枝曠  
望天宇內沈寥此何時朱火已盈謝清商屆其期覽鏡  
忽自嗟綠鬢生素絲萬物有榮悴造化豈吾私

其十五

躑躅遠遊子驅車上高山高山多隴坂悲哉路何艱其  
顛摩蒼穹欲上不可攀日暮牛力疲前征未能閒雙輪  
忽中摧一墮深谷間引領望黃鵠失路何當還

其十六

蜀琴有奇紋本是枯桐枝一彈舞鸞鶴再彈下靈祇曾  
持薦黃帝雲中奏咸池棄置久不調流塵被朱絲終焉  
含妙響未始有成虧

其十七

達人貴金生外物等秋草顧此七尺軀卽爲萬金寶味  
者營所嗜棄捐不待老豈無室中資他人是來保何如  
餌金液長令鬢顏好

其十八

千秋取丞相一語悟君衷長孺多讜言白頭攢居東人  
命有通塞主聽無違從失如魚去波得若雲遇龍會合  
感冥相佳期諒難逢卞生未聞道無事涕沾臍

其十九

南山多浮雲北山有高樹因風暫來依風回復飛去兄  
弟滿四海幾人此相遇握手交百歡分襟滋十慮蹤跡  
不可常無為嗟去住

其二十

鴻鵠橫四海鷗鷯戀蓬榛長松凌風煙小草亦自春各  
稟造化育逍遙適其真無將赫赫者下比棲棲人

詠隱逸

十六首

向長

子平謝累辟推志在隱居家貧或有饋取足反其餘讀  
易深自悟謂賤貴不如救言嫁娶畢家事無關余同好  
有禽生肆意相與娛茫茫五嶽去孰得回其車

周黨

世祖初厭武開觀在東都使者遍巖薮旌帛召賢儒伯  
況亦暫起綃頭詣尚書引見伏自陳始願不敢渝周興  
有恥食堯禪或羞汙士固本志聖主焉能拘范生乃  
見毀咄爾何其愚

王霸

儒仲有清節始一應徵命造廷抗高辭不肯臣萬乘歸  
來自耕野蓬藿掩門逕翩翩故人子相過容服盛一念  
兒曹羞客去卧如病賴有賢婦言不失初守正嘉遯遂  
終身清輝兩相映

梁鴻

伯鸞古賢人乃在杵臼間夫婦共守志逃名入深山淒  
涼五噫歌東出過帝關齊魯復荆吳長往遂不還為傭



豈無勞顧已少外患終葬烈士旁高風邈誰攀

法真

高卿闕西儒好學賤榮祿閉門不交世弟子相誦讀太  
守者何人欲以吏見錄誓在南山南胡肯勞案牘連徵  
終不就皦皦離垢俗郭子有頌詞玄德久愈暴

韓休

伯休始賣藥志將晦當時如何不二名乃為女子知玄  
纁強見聘使至焉得辭凌晨自先發不駕安車馳亭長

遠迎候未識徵君誰修道奪其牛解與不復疑中途遂  
長遁蹤跡竟莫追乃知超雲驥塵轡何由羈

陳留老父

漢衰黨獄起朝柄在刑餘皇皇外黃令去官返鄉閭班  
草逢故人涕泣語路隅邦危德無援忠良恐遭誅有叟  
過其旁植杖為踟躕嘆之歎且言何悲二大夫鸞鳳不  
隱羽安能免豈學欲問不肯顧飄然邁長途賢哉此老  
翁嗟嗟乃誰歟

龐公

南陽有龍鳳乘時各飛翻  
鴻鵠獨深棲不肯居籠樊  
皤皤隴上耕遠辱刺史軒  
豈不念子孫遺安乃名言采藥  
不復返亭亭空鹿門

漢濱老父

漢濱有老翁初不語鄉里  
天子雲夢游盼望臨沔水居  
人悉縱觀翁獨耕不已郎官下道問  
答言野人耳借問  
世立君豈將使為理奈何從游佚  
勞人奉諸已尚忍令

人觀吾實為子恥忽如驚鴻騫孰能躡其軌名姓且莫  
知超哉隱君子

王績

無功始亦仕季代邁亂屯投劾乃徑歸不作嬰網鱗結  
廬河渚北喜與瘖士鄰相逢雖多言不若無語真種黍  
養鳬雁逍遙度秋春乘牛過酒家留連或經旬嗜飲豈  
沉湎醉鄉可逃身北門與樂署暫屈誠此因賢哉焦史  
妻相饋不厭勤酣歌自遺世嵇阮其能倫

朱桃椎

祭酒絕俗者曳索復披裘自匿林莽間不入成都游織  
僞易米茗於人又何求偲偲高長史延見禮甚修瞪視  
雖不言默教意已周欲使如曹參無事治一州忽去返  
山谷避寢安可留

武攸緒

孽后移寶鼎同姓咸析珪獨去謝親寵龍門事冥棲澹  
泊如素裳衣褐復茹藜賜器不肯御牀頭委塵泥族人

豈不華回首已粉齏苟榮禍必集達識乃弗迷蟬蛻衆  
濁中名與嵩高齊

盧鴻

顓然守秦一高卧在幽壤開元始求治賢哲勞夢想詔  
書赴嚴扃宸意勤挹仰入京遽還山孰得縻以鞅天子  
遂其高營室致安養爵祿不可加貪士應泚頽

秦系

公緒避時亂不駕戎府車南安大松間卜築聊可居穴

石為巨硯坐衍老氏書刺史致羊酒歲時造其廬不拒  
亦不謝偃息每自如懷道誠可稱工詩乃其餘

陸龜蒙

魯望好任散心與太古期俗夫晨叩門不肯一見之下  
田與江通終歲恒苦饑荻刺不告勞常師禹胼胝酒酣  
發長歌猶有憤亂悲寧不念枯槁行哉豈其時

張志和

超超玄真子游浪煙水中散舟以為家來往無定蹤自

言處太虛四海長相從  
奴婢兩夫婦耕織粗可供天子  
不得見丹青繪其容  
漁歌復識聞山水邀其重

吳越紀遊

十五首

始發南門晚行道中

歲暮寒亦行  
征人有常期  
辭我家鄉樂  
適彼道路危  
酒闌別賓親  
驅車出郊岐  
我馬力未痛  
已越山與陂  
回頭望高城  
落日雲樹滋  
遭亂旣少安  
謀生復多饑  
途逢往來人  
孰不為此驅  
遠遊亦吾志  
去矣何勞悲



渡浙江宿西興民家

挂帆無天風到岸日已夕  
捨舟理輕裝欲問古鎮驛  
泝灘聲迴莽莽山氣積  
僕夫夜畏虎告我勿遠適  
望林投人家炊黍旋敲石  
寒眠多虛警我體若畏席  
誰云別家遙數日已在客  
今宵始驚歎東西大江隔

早過蕭山歷白鶴柯亭諸郵

客起何太早村荒絕難鳴  
况時江雨晦不得見啓明  
凌兢度高關山空縣無城  
隔林聞人呼已有先我行  
側身

避徑滑聚足防厓傾衣寒復多風聒聒遠水聲千峰霧  
中過不識狀與名嵐開見前郵始覺歷數程越禽啼楓  
篁冷日傍午晴煙生沙墟寂葉落澗寺清登臨亦可悅  
但恨時非平

次錢清江謁劉寵廟

亭亭樹間祠落日小江口停舟拜孤像開幔蒼鼠走憶  
公治邦時德感山谷叟臨行謝其饋清風在茲久我方  
東征急不得奠杯酒惆悵出煙扉殘邨夜聞狗

登蓬萊閣望雲門秦望諸山

旅思曠然釋置身蒼林杪羣山為誰來歷歷散清曉  
竒姿脫霧雨奮首爭欲矯氣通海煙長色帶州郭小曲疑  
藏啼猿橫恐截歸鳥流暉互蕩激下有湖壑繞佳處未  
遍經一覽心頗了秦皇遺跡泯晉士流風杳願探金匱  
篇振袂翔塵表

聞長槍兵至出越城夜投龕山

列藩過戎亂駐鉞實此州如何殺大將王師自相讎我

來亂始定城郭氣尚愁又聞有鄰兵倉卒豈敢留促還  
出西門天寒絕行輜古戍暗雨雪旌旗暮悠悠野屋閉  
不守澤田棄誰收居人且奔逃游子安得休逶迤蒼山  
去決潏玄雲浮人虎爭夜行風榛嘯巖幽我徒戒相親  
一失未易求饑拾谷口粟寒燒澗中楸神迷路多迂再  
宿達海陬雖嘗登頓勞幸免迫辱憂聖尼畏於匡嗟我  
敢有尤但慙去越早不遂名山遊

夜抵江上候船至曉始行

夜辭西陵館霜谷猿叫歇津卒未具舟天險不可越漁  
商雜候渡寒立沙上月蒼煙隱遙汀益覺潮漲闊開橈  
散驚鳬海色曙初發曠曠前山來稍稍後嶺沒中流聞  
鼓角隔岸見城闕客路得奇觀臨風悶俱豁

登鳳凰山尋故宮遺跡

茲山勢將飛宮殿壓其上江潮正東來朝夕似奔嚮當  
時結構意欲敵汴都壯我來百年後紫氣愁不王烏啼  
壁門空落葉滿陰障風悲度遺樂樹古羅嚴仗行人悼

降王故老怨奸相蒼天何悠悠未得問興喪世運今復  
哀淒涼一回望

宿湯氏江樓夜起觀潮

舟師夜驚呼隔浦亂燈集潮聲若萬騎怒奪海門入初  
來聽猶遠忽過顧無及震搖高山動噴灑明月溼霜風  
助翻江蛟龍苦難蟄應知陰陽氣來往此呼吸登樓覺  
神壯憑險方迴立何處望靈旗煙中去波急

過奉口戰場

路迴荒山開如出古塞門驚沙四邊起寒日慘欲昏上  
有饑鶯聲下有枯蓬根白骨橫馬前貴賤寧復論不知  
將軍誰此地昔戰奔我欲問路人前行盡空邨登高望  
廢壘鬼結愁雲屯當時十萬師覆沒能幾存應有獨老  
翁來此哭子孫年來未休兵強弱事并吞功名竟誰成  
殺人遍乾坤媿無拯亂術佇立空傷魂

泊德清縣前望金鷺玉塵二峰

歸遠行不緩頗失眺山水獨憐茲峰秀欲去舟且檣層

巒迴長谿日落蒼霧起寒城動遙炊晚渡罷孤市豈唯  
地景幽況乃民俗美牛羊散樹下曖曖舊墟里田腴收  
穫富縣靜爭訟止畏途遇樂境我意方一喜嘯歌逐漁  
翁暫宿浦煙裏篠疎風倚倚月偃波瀾瀾旅顏在塵中  
逢人固多恥安得託此居長年息行李

舟次敢山阻風累日登近岸荒岡僧舍

高岸鳴枯桑湖陰北風厲寒濤洶我前幾日不得濟孤  
舟恐漂蕩石根暮牢繫憂來厭聞卧近寺聊獨詣雀饑



殘林空人倦危磴細年荒無居僧樹死石門閉神傷却  
欲返微霰灑征袂窮冬已崢嶸故國尚迢遞仰看浮雲  
馳東路阻歸計長歎復何言吾生信多滯

過硤石

硤石頗奇壯長河出連山絕壁兩岸開行舟過其間高  
處誰解登陰藤裊難攀旁垂雨痕古仰露天光慳不知  
真宰意隨地設險艱一夫據蜀閣二世憑秦關賴此非  
要區爭奪得少閒徘徊佇望久日暮飛雲還

謁雙廟

維昔天寶末君王寵奸虜雄邊委強兵遺患同養虎叛  
聞遽西幸骨肉棄榛莽河北二十州義士誰禦侮兩公  
起誓衆慟哭告玄祖橫身過其衝江淮保安土孤城無  
全堞百戰霜月苦力窮援不來嚙齒罵益怒殘兵日饑  
疲秋風仆旗鼓男兒不生降一死冠今古故鄉有遺廟  
俗祭巫屢舞丹青網塵中爽氣猶可覩嗟今屬喪亂戎  
馬正旁午臨危肯捐軀如公未多數獨立為悲傷斜陽

下寒楚

登海昌城樓望海

百川浩皆東元氣流不息混茫自太古於此見容德積  
陰漲玄濤萬里失空色鴻鵠去不窮魚龍變莫測朝登  
茲樓望動盪豁胸臆始知滄溟大外絡九州域日出水  
底宮煙生島中國寬疑浸天爛怒欲吹地是常時烈風  
興海若不受職長堤此宵潰頻勞負薪塞況今艱危際  
民苦在墊溺有地不可居瀕洞風塵黑安得擊水遊圖

南附鵬翼

春日懷十友詩

余司馬亮臣

列戟衛嚴關應無休沐暇羣英罷追遊餘香掩空榭飛  
花北郭晚華月南園夜清景不能同蹉跎恐年謝

張校理羽

端居養恬素獨詠聖人篇夕景臨池酌春寒掩閣眠芳  
樂初翻雨新篠稍披煙累日虧幽訪慙余塵務牽

楊署令集

詞苑擅高步早歲許追隨屢枉瑤華句長依瓊樹姿  
齋居積冲抱園賞過芳時暫闕今朝會勞人耿耿思

王隱君行

共此一里居離令阻良觀惆悵步芳園山櫻還獨摘  
風含駐花意雨散流池跡尊酒不來同茲晨端可惜

呂道士敏

同謂在塵境獨能依道門園齋坐永日庭綠靄初繁  
觀

妙夙有契悟靜自無煩晨策思頻往聆君超世言

宋軍吉克

看花西澗寺憶子昔同行蘭入華觴氣波汎綠琴聲  
歡隨節逝離恨坐相嬰安得重聯騎射雉出東城

徐記室貞

晨興理拂罷禽聲悅清旭雨餘嘉樹新色暎春塘綠  
景感幽懷步陰思往躅攜手此逍遙須君慰心曲

陳孝廉則

和春易為感復此棲孤寂鶯啼遠林雨悵望鄉園隔客  
舍換衣晨僧齋聽鐘夕知君思正紛離英共如積

僧道行

楞伽曾往問緣澗冒嵐深殘雪寒山暮幽扉閉竹林欲  
寄棲禪跡尚違捐俗心別後空遙念迢迢雙樹陰

王徵士興

遠客歎留滯對雨卧閒房江上歸舟阻蘼蕪春自芳微  
疴偶見侵勝賞坐成妨斯章亦何取持擬釋離腸

秋懷 十首

少時志氣壯不識秋氣悲呼僞射鳴鴈深驚東山陂中  
年漸多懷惻惻當此時登高望原陸不見車馬馳思我  
平生歡高墳鬱鬱累世人非羨門誰能久華滋惟有盈  
觴酒可以持自怡

其二

明月出遠林流輝鑒牀幃促促草下蟲催我索故衣起  
歎秋夜長欲取鳴琴揮掩抑不成弄中心復乖違有懷



難自宣勿謂知音稀

其三

寥荷荷已老采蘭蘭亦摧無由翫芳物悵望江之隈木  
落山更空猿聲有餘哀所思去我遠佳期邈悠哉被垢  
尚可澣抹漆猶難開我愁亦可念當秋鬱難裁棄置勿  
歎息多愁損顏衰

其四

志士憂歲晚羈人感秋早騷騷鬢絲垂索索枯葉槁誰

言衆芳歇時菊正鮮好日暮餐其英聊開我懷抱貧賤  
難久居欲去恐違道時命恐未通徜徉以終老

其五

秋風夜颼颼秋色日瀟灑歡人亦心驚况乃居愁者塊  
處厭空宇命駕聊適野征鴻暮相呼牛羊亦同下我居  
久離羣憂襟向誰寫

其六

涼風動幽幔高堂夜空虛明燈無與語聊讀古人書古

人亦何人使我不得如棄卷輒還卧終宵自歎歔

其七

鳴蟲入我戶落葉覆我井何無四方志戀此一室靜問  
途欲晨征畏踐霜露冷濁醪幸方熟夕飲燭可炳勿憂  
去日多但願來日永不知苦驅馳孰若長酩酊

其八

弱齡弄篇翰出門結羣賢俛仰幾何時已有好新年歡  
晤雖常逢憂患亦屢牽世故逐人老髮鬢能久玄沉思

復何為省我旣往愆問道行已歇中途曷歸旋

其九

朝遊荒岡陞暮行空潭側我非楚大夫何有憔悴色良  
辰思遠騁周道廣且直我馬力不前回駕任偃息踟躕  
阻修程日夕睇西北苟安非予志所懼時未識

其十

弭棹望江涘日落青楓林驚波駛且廣蕩漾浮雲陰靡  
靡臯蘭衰噫噫渚鴻吟顧此凜節謝憂來忽傷心宗子

悲已多潘生歎彌深自古有此愁誰云獨吾今

出郊抵東屯

故鄉一區田自我先人遺賴此容我懶不耕坐待炊霜  
露被寒野屬當斂穫時言來徵薄入稅駕宿東陂今年  
雖未豐亦足療我饑萬鍾知難稱保此復何辭

其二

彌別難登場秋稼稍狼藉疎榆蔭門巷景暗煙火夕田  
家雖作苦於世寡憂戚況當收穫景斗酒復可適所以

沮溺徒躬耕不辭劇

其三

我本東臯氓偶往往州城茲來卧農舍頓愜田野情如  
魚反故淵悠然樂其生臨去謝主媼重來自藜羹我非  
催租吏叩門勿相驚


其四

朝服久已解儼然山澤臞欲狎林野人相歡混賢愚朝  
來此水濱高歌步踟躕忽逢一田父舍耕拜路隅疑我

是長官怪我體貌殊我已忘所有彼我未忘歟不能使  
爭席心媿禦寇徒

其五

坐久體不適卷書出柴闌臨流偶西望正見秦餘山野  
淨寒木疎川長暝禽還此中忽有得怡然散襟顏遂同  
樵牧歸歌笑落日間



大全集卷三